

# PANEL RHIANT CORFFORAETHOL

## Cofnodion y cyfarfod rhithwir a gynhaliwyd ar 7 Rhagfyr 2021

**PRESENNOL:** Mrs Annwen Morgan (Prif Weithredwr) (Cadeirydd)

Y Cynghorydd Llinos Medi (Arweinydd y Cyngor ac Aelod Portffolio Gwasanaethau Cymdeithasol)

Y Cynghorydd R. Meirion Jones (Aelod Portffolio Addysg, Llyfrgelloedd, Ieuenctid a Diwylliant)

Y Cynghorydd Richard Griffiths (Pwyllgor Sgriwtini Corfforaethol)

Barbara Jones (Cymdeithas Gofalwyr Maeth Ynys Môn)

Liz Fletcher (Cyfarwyddwr Cynorthwyol Ardal y Gorllewin – Plant, BIPBC) (eitem 7 ymlaen)

Fôn Roberts (Cyfarwyddwr Gwasanaethau Cymdeithasol)

Rhys Hughes (Cyfarwyddwr Addysg, Sgiliau a Phobl Ifanc)

Ned Michael (Pennaeth Gwasanaethau Tai)

Saul Ainsworth (Rheolwr Gwasanaeth Dros Dro – Diogelu)

Huw Owen (Swyddog Adolygu a Diogelu Annibynnol)

Dawn Owen (Swyddog Adolygu a Diogelu Annibynnol)

Clare Owen (Swyddog Adolygu a Diogelu Annibynnol)

Gwyneth Hughes (Uwch Reolwr Llesiant)

Heulwen Owen (Swyddog Cyswllt Addysg Plant sy'n Derbyn Gofal)

Ffion Roberts (Nyrs Plant sy'n Derbyn Gofal)

Ann Holmes (Swyddog Pwyllgor)

**YMDDIHEURIADAU:** Y Cynghorydd Margaret M. Roberts, Llŷr Bryn Roberts (Rheolwr Gwasanaeth – Ymyrraeth Ddwys), Nia Hardaker (Swyddog Adolygu Annibynnol), Sioned Warren (*Voices from Care Cymru*)

---

Croesawodd y Cadeirydd bawb a oedd yn bresennol a chyflwynodd pawb eu hunain.

### 1 DATGAN DIDDORDEB

Ni dderbyniwyd yr un datganiad o ddiddordeb.

### 2 COFNODION Y CYFARFOD BLAENOROL

Cyflwynwyd cofnodion cyfarfod blaenorol y Panel Rhiant Corfforaethol a gynhaliwyd ar 7 Medi 2021 a chadarnhawyd eu bod yn gywir.

### 3 MATERION YN CODI

Cyflwynwyd, i'r panel ei ystyried, adroddiad gan y Rheolwr Gwasanaeth Dros Dro (Diogelu) ar fynediad at weithgareddau cymdeithasol a hamdden i blant a phobl ifanc yng ngofal yr Awdurdod. Roedd yr adroddiad yn deillio o drafodaeth yng nghyfarfod y Panel ym mis Mehefin 2021 ar adroddiad am y gwasanaethau sydd ar gael i gefnogi lles emosiynol plant sy'n derbyn gofal yn ystod ac yn dilyn y pandemig.

Dywedodd y Cyfarwyddwr Gwasanaethau Cymdeithasol ei fod yn falch bod yr adborth gan weithwyr cymdeithasol y cysylltwyd â nhw i gasglu gwybodaeth ynghylch gweithgareddau yr oedd plant a phobl ifanc yn cymryd rhan ynddynt ac i ofyn a oedd unrhyw beth yn eu rhwystro rhag cymryd rhan, yn nodi ar y cyfan bod mynediad at weithgareddau'n agosáu at y lefelau a welwyd cyn y pandemig, er bod mwy o drefniadau

diogelwch Covid ar waith. Roedd yn galonogol hefyd derbyn adborth ar yr amrywiaeth eang o weithgareddau y mae plant a phobl ifanc yn cymryd rhan ynddynt ac mae'r manylion hynny wedi'u cynnwys yn yr adroddiad. Yn ogystal, mae gan ofalwyr maeth Ynys Môn fynediad am ddim i ganolfannau hamdden yr Ynys ac mae rhai plant a phobl ifanc yn gwneud y mwyaf o'r cyfleoedd a ddaw yn sgil hynny. Ers haf 2020, mae Llywodraeth Cymru wedi ariannu'r cynllun Haf o Hwyl i ddarparu cynllun gofal dros yr haf i blant bregus, yn cynnwys plant a phobl ifanc sydd yng ngofal yr Awdurdod, am chwe wythnos yn ystod gwyliau'r haf. Y nod oedd ysgogi plant yn feddyliol a chorfforol, eu cyflwyno i weithgareddau a gemau newydd, datblygu eu sgiliau a darparu lle diogel iddynt gael mwynhau gwyliau'r haf. Yn ystod haf 2021, sefydlwyd wyth o ganolfannau ledled yr Ynys a darparwyd sesiynau dan ofal amrywiaeth eang o sefydliadau sy'n cael eu rhestru yn yr adroddiad. Bydd Llywodraeth Cymru'n darparu cyllid ychwanegol eleni o'r Gronfa Gaeaf Llawn Lles ac fe'i defnyddir i ddarparu cyfleoedd tebyg i blant a phobl ifanc bregus ledled yr Ynys.

Dyweddodd y Cyfarwyddwr Gwasanaethau Cymdeithasol bod yr adroddiad yn rhoi sicrwydd ynghylch argaeledd gweithgareddau hamdden a chyfleoedd chwarae a hamdden i blant a phobl ifanc yng ngofal yr Awdurdod. Er bod y pandemig a'r cyfyngiadau a ddaeth yn ei sgil wedi bod yn heriol ar brydiau, gyda rhai pobl ifanc yn ei chael yn anoddach nag eraill i ail-ymgysylltu â gweithgareddau wrth i'r cyfyngiadau lacio, roedd yn hyderus bod yr holl blant a phobl ifanc yng ngofal yr Awdurdod naill ai wedi ailgychwyn y gweithgareddau yr oeddent yn cymryd rhan ynddynt cyn y pandemig, neu eu bod wedi dechrau gweithgareddau newydd, a bod hynny'n llesol i'w lles emosiynol a meddyliol. Mae gweithwyr cymdeithasol wedi cadw mewn cysylltiad â gofalwyr maeth a'r plant a'r pobl ifanc sy'n derbyn gofal trwy gydol y pandemig ac maent wedi darparu cymorth hefyd, trwy ddsbarthu pecynnau gweithgareddau er enghraifft. Mae Swyddogion Adolygu Annibynnol yn edrych ar gyfranogiad ac ymgysylltiad hefyd fel rhan o'u hadolygiad o'r cynlluniau a'r ddarpariaeth ar gyfer plant sy'n derbyn gofal.

Dyweddodd y Rheolwr Gwasanaeth Dros Dro (Diogelu) bod lleoliad daearyddol yr Ynys yn golygu bod mwy o fynediad ar gael i rai gweithgareddau hamdden, yn enwedig y rheiny yn yr awyr agored, ar dir neu ar y môr, ac roedd hynny'n amlwg yn yr adborth a dderbyniwyd. Mae ymrwymiad a dyfeisgarwch gofalwyr wrth gefnogi gweithgareddau hamdden plant yn eu gofal wedi bod yn glodwiw ac maent yn haeddu diolch am hynny.

Roedd y Panel yn croesawu'r adroddiad ac yn cydnabod pwysigrwydd gweithgareddau cymdeithasol a hamdden i les plant a phobl ifanc yng ngofal yr Awdurdod a gofynnodd aelodau am sicrwydd pellach ynglŷn â'r pwyntiau a ganlyn -

- Wrth edrych ymlaen, ac o ystyried yr ansicrwydd sy'n bodoli o hyd ynghylch sefyllfa Covid-19 a sut fydd y sefyllfa'n datblygu yn ystod y misoedd nesaf a thu hwnt i hynny, beth yw'r rhagolygon ar gyfer darparu gweithgareddau hamdden i blant a phobl ifanc sy'n derbyn gofal ac a yw'r ddarpariaeth yn ddibynnol ar gyllid allanol.

Dyweddodd y Cyfarwyddwr Gwasanaethau Cymdeithasol bod tua 400 o sesiynau gweithgareddau amrywiol wedi'u cynnal yn ystod yr haf gyda chymorth arian grant ac ni fyddai'n bosib darparu'r un lefel ac amrywiaeth o weithgareddau heb yr arian hwnnw. Gwariwyd yr arian i gyd ac roedd cefnogaeth dda iawn i rai o'r sesiynau, o ystyried ffactorau megis y tywydd. Mae Llywodraeth Cymru wedi ariannu'r cynllun Haf o Hwyl dros y ddwy flynedd ddiwethaf ac mae hyn wedi gwneud gwahaniaeth drwy ganiatáu i'r Awdurdod gynnig cyfleoedd a phrofiadau i blant a phobl ifanc sy'n derbyn gofal na fyddai wedi bod ar gael iddynt fel arall.

- A gynigiwyd gweithgaredd a/neu gyfle i bob plentyn a/neu berson ifanc sy'n derbyn gofal.

Dywedodd y Cyfarwyddwr Gwasanaethau Cymdeithasol, er nad yw bob plentyn neu berson ifanc sy'n derbyn gofal angen neu eisiau "rhywbeth" o reidrwydd, mae'r cynnig ar gael i bawb. Mae rhai plant a phobl ifanc sy'n derbyn gofal yn cymryd rhan mewn gweithgareddau trwy neu gyda'u gofaluwr maeth ac mae'r Fforwm Gofaluwr Maeth yn weithgar wrth wneud trefniadau o'r fath ar gyfer plant sy'n derbyn gofal maeth. Mae eraill yn cymryd rhan mewn gweithgareddau hamdden a chymdeithasol prif lif. Mae'r Gwasanaeth wedi sefydlu proses gyfathrebu gadarn i sicrhau bod gwybodaeth am gyfleoedd a gweithgareddau'n cael eu rhannu â phlant, pobl ifanc a'u gofaluwr.

- A yw'r Panel yn sicr fod y math o weithgareddau a drefnir yn cyd-fynd â'r hyn y mae plant a phobl ifanc yn ei ddymuno ac i ba raddau y maen nhw'n cyfrannu at lunio'r ddarpariaeth hamdden/gweithgareddau. Wrth fynegi ychydig o bryder bod y ddarpariaeth hamdden/gweithgareddau a grëwyd yn ddibynnol ar grantiau, a bod hynny'n risg pe byddai'r arian grant hwnnw'n cael ei dynnu'n ôl, gofynnodd y Panel sut ellir gosod sylfeini mwy cynaliadwy i'r ddarpariaeth yn y dyfodol, os ystyrir ei fod yn cael yr effaith a ddymunir o ran cyfannu at wytnwch a llesiant plant a phobl ifanc sydd yng ngofal yr Awdurdod.

Dywedodd y Cyfarwyddwr Gwasanaethau Cymdeithasol bod modd i'r Gwasanaeth gasglu barn plant a phobl ifanc mewn sawl ffordd, gan gynnwys yr adolygiadau a gynhelir gan y Swyddogion Adolygu Annibynnol a'u cyswllt â'r plant rhwng cyfarfodydd; trwy weithwyr cymdeithasol a gofaluwr a thrwy *Voices from Care Cymru* sy'n gweithio ar brosiect i wella cyfranogiad ac ymgysylltiad plant. Efallai y bydd rhaid cynnal trafodaeth os oes costau ynghlwm â'r gweithgaredd/hobi/diddordeb, ond yn gyffredinol mae'r Gwasanaeth yn gallu gwireddu dymuniadau'r plentyn sy'n derbyn gofal trwy ddefnyddio'r gyllideb sydd heb ei neilltuo a bydd hefyd yn defnyddio cyllid o ffynonellau eraill lle bo hynny'n briodol e.e. Cronfa Dydd Gŵyl Dewi a/neu gyd-weithio â'r gofaluwr maeth a/neu'r teulu i sicrhau bod plant sy'n derbyn gofal yn cael yr un cyfleoedd a'u cyfoedion.

**Cytunwyd i dderbyn a nodi'r adroddiad, er gwybodaeth.**

**Ni wnaed unrhyw argymhellion pellach.**

#### **4 GRŴP CYFRANOGIAD VOICES FROM CARE CYMRU**

Yn absenoldeb Sioned Warren, *Voices from Care Cymru*, a oedd fod i ddarparu diweddariad ar gynnydd y grŵp cyfranogi i'r cyfarfod hwn, awgrymodd y Cadeirydd bod yr eitem yn cael ei gohirio i gyfarfod nesaf y Panel er mwyn caniatáu i *Voices from Care Cymru* ddarparu diweddariad ac ymateb i'r camau gweithredu y cytunwyd arnynt ac, yn ogystal, rhoi cyfle i'r Panel dderbyn sicrwydd ynghylch y materion a godwyd.

Yn dilyn trafodaeth bellach, pryd y tynnwyd sylw at y ffaith y byddai'n golygu gadael y mater am dri mis arall, ac ar ôl cadarnhau na dderbyniwyd adroddiad cyn y cyfarfod hwn, cynigiodd y Cyfarwyddwr Gwasanaethau Cymdeithasol y dylid trafod y mater gyda Sioned Warren mewn cyfarfod gyda *Voices from Care Cymru* a drefnwyd gan y Gwasanaeth yn ddiweddarach yr wythnos honno, a gofyn am adroddiad i'w gylchredeg i aelodau'r Panel er mwyn iddynt gynnig sylwadau a/neu ofyn cwestiynau yn y cyfamser, a bod y Gwasanaeth yn ymateb o fewn amserlen i'w chytuno.

**Cytunwyd i symud ymlaen yn unol â'r trefniant a gyflwynwyd gan y Cyfarwyddwr Gwasanaethau Cymdeithasol fel yr amlinellir uchod.**

## **5 TEMPLEDI DIWYGIEDIG – CYNLLUN GOFAL A CHYMORTH RHAN 6 A CHYNLLUN LLWYBR**

Cyflwynwyd, i'r Panel ei ystyried, adroddiad y Rheolwr Gwasanaeth Dros Dro (Diogelu) yn ymgorffori templedi diwygiedig ar gyfer y Cynllun Gofal a Chymorth Rhan 6 a'r Cynllun Llwybr.

Dyweddodd y Cyfarwyddwr Gwasanaethau Cymdeithasol fod y Panel yn ymwybodol ers cryn amser o'r pryderon am y templedi yn y system WCCIS sy'n cael eu hystyried yn anhylaw gan ymarferwyr ac, yn bwysicach, yn anodd i blant, pobl ifanc a'u teuluoedd eu dilyn. Yn y cyfarfod ym mis Mehefin dywedwyd wrth y Panel y byddai'r templedi'n cael eu hadolygu ac, o ystyried yr adborth negyddol a gafwyd i'r Cynllun Gofal a Chymorth Rhan 6 a'r Cynllun Llwybr yn arbennig, byddai blaenoriaeth yn cael ei roi i'r dogfennau hynny. Mae'r templedi diwygiedig sydd ynghlwm i'r adroddiad yn addasiadau o'r templedi gwreiddiol a luniwyd gan Lywodraeth Cymru ac yn ystod yr wythnosau diwethaf cawsant eu drafftio, ac yn dilyn ymgynghori arnynt a'u diwygio mae'r Gwasanaeth wedi eu cymeradwyo. Mae'r Cynllun Gofal a Chymorth Rhan 6 wedi'i leihau o 43 tudalen i 15 tudalen ac mae'r Cynllun Llwybr wedi'i leihau o 25 i 9 tudalen, ond maent yn parhau i gwrdd â gofynion Llywodraeth Cymru. Cyflawnwyd hyn trwy ddileu unrhyw ddyblygu a thacluso trefn y templedi yn gyffredinol.

Gan fod y dogfennau'n darparu data perfformiad, eglurodd y Cyfarwyddwr Gwasanaethau Cymdeithasol bod rhaid i'r Gwasanaeth sicrhau fod y fersiynau diwygiedig yn diwallu anghenion darparu data cyn eu hymgorffori yn y system WCCIS. Bydd y gwaith hwnnw'n cael ei wneud yn ystod yr wythnosau nesaf a'r bwriad yw rhoi'r templedi newydd ar waith erbyn diwedd mis Ionawr 2022. Yn ogystal â chwtoigi hyd a maint y cynlluniau, roedd y Gwasanaeth o'r farn bod lle i wneud y dogfennau'n fwy hwylus i'w defnyddio o ran arddull ac iaith fel eu bod yn haws eu defnyddio a'u deall.

Roedd y Panel y croesawu'r bwriad i edrych ar arddull y templedi ac roeddent yn credu y dylid eu hysgrifennu mewn iaith hygyrch sy'n gyfforddus i'r defnyddiwr. Roedd y Panel yn credu hefyd na ddylai'r dogfennau fod yn rhy "fiwrocrataidd" neu'n ymarfer ticio blychau yn unig, ond bod angen iddynt fod yn ddogfennau "byw" y gellir eu diweddarau'n rhwydd wrth i amgylchiadau, safbwyntiau a dymuniadau newid. I'r perwyl hwnnw, awgrymwyd y byddai fformat digidol yn well ar gyfer diweddarau'r templedi.

Dyweddodd y Cyfarwyddwr Gwasanaethau Cymdeithasol fod y Gwasanaeth wedi datblygu "ap" fel ffordd well i blant a phobl ifanc gofnodi eu meddyliau a gellir ei ddefnyddio i fwydo gwybodaeth i'r templedi. Wrth gydnabod y gall y dogfennau ymddangos yn statig, pwysleisiodd y Rheolwr Gwasanaeth Dros Dro (Diogelu) nad dyma'r unig ffordd o gasglu safbwyntiau plant a phobl ifanc. Bu'n rhaid i'r Gwasanaeth reoli'r newidiadau i'r templedi yng nghyd-destun y gofynion cyfreithiol. Diwygiwyd y Cynllun Llwybr trwy weithio gyda pherson ifanc ac mae'r templed wedi cael ei dreialu gyda phum person ifanc sy'n gadael gofal ac roedd eu hymateb yn gadarnhaol. Mae'r gwasanaeth yn cydnabod nad yw'r templedi diwygiedig yn berffaith, er eu bod yn well na'r rhai blaenorol.

**Cytunwyd i gymeradwyo'r templedi diwygiedig ar gyfer y Cynllun Gofal a Chymorth Rhan 6 a'r Cynllun Llwybr fydd yn cael eu defnyddio o ddiwedd mis Ionawr 2022.**

**Ni wnaed unrhyw argymhellion pellach.**

## **6 CAU ALLAN Y WASG A'R CYHOEDD**

**Penderfynwyd o dan Adran 100 (A)(4) Deddf Llywodraeth Leol 1972, i gau allan y wasg a'r cyhoedd o'r cyfarfod yn ystod y drafodaeth ar yr eitem ganlynol, oherwydd y caiff gwybodaeth ei rhyddhau a honno'n wybodaeth eithriedig fel y'i diffinnir ym Mharagraffau 12 ac 13 [gwybodaeth yn ymwneud ag unigolyn penodol/gwybodaeth sy'n debygol o ddatgelu pwy yw unigolyn] o Atodlen 12A y Ddeddf honno."**

## 7 CANLYNIADAU ADDYSGOL PLANT A PHOBL IFANC SY’N DERBYN GOFAL

Rhoddodd yr Uwch Reolwr Llesiant ddiweddariad llafar i’r Panel.

Wrth osod cyd-destun i’r diweddariad, dywedodd y Cyfarwyddwr Addysg, Sgiliau a Phobl Ifanc wrth y Panel bod trefniadau addysgol wedi newid yn sgil y pandemig a bod y trefniadau ar gyfer adrodd ar berfformiad wedi newid hefyd. Yn 2020, defnyddiwyd graddau asesu canolfannau ac yn 2021 roedd perfformiad yn seiliedig ar raddau a bennwyd gan ganolfannau. Ni chynhaliwyd arholiadau yn ystod 2020 a 2021 a seiliwyd y graddau ar gyfuniad o ddyfarniadau gan ysgolion ac athrawon a phrofion a gynhaliwyd yn ystod y flwyddyn. Ni chyhoeddwyd unrhyw ddata perfformiad yn ystod cyfnod y pandemig ac nid oes unrhyw ddata cymharol ar gael ar gyfer y cyfnod hwnnw. Mae trafodaethau cenedlaethol yn mynd rhagddynt ar sut i symud ymlaen yn 2022 a’r nod yw mynd yn ôl at system debyg i’r trefniadau blaenorol, ond nid oes unrhyw sicrwydd mai dyma fydd yn digwydd. Gan fod y broses o adrodd i’r Pwyllgor Sgriwtini ar gyraeddiadau disgyblion wedi newid hefyd, mae’n anodd darparu gwybodaeth am gynnydd disgyblion.

Dywedodd yr Aelod Portffolio Addysg, Llyfrgelloedd, Ieuenctid a Diwylliant bod yr Awdurdod yn ymwybodol fod angen sicrwydd ar ddisgyblion a bu’r Awdurdod yn pwysu ar CBAC i gael rhyw arwydd o’r trefniadau asesu fydd ar waith yn 2022, er iddo gydnabod bod hynny’n heriol oherwydd gallai’r amgylchiadau newid yn gyflym wrth i’r pandemig ei hun newid ac esblygu.

Cyflwynodd yr Uwch Reolwr Llesiant y wybodaeth a ganlyn i’r Panel -

- O’r 155 o blant sydd yng ngofal yr Awdurdod ar hyn o bryd, mae 120 o oedran ysgol (3 – 16 oed) a 24 yn 16 i 17 oed. Mae rhai o’r bobl ifanc mewn addysg ôl-16 ac mae eraill yn derbyn cymorth ac yn chwilio am waith.
- Mae cyfran o’r plant mae’r Awdurdod yn gofalu amdanynt yn ddisgyblion mewn ysgolion uwchradd ar Ynys Môn ac mae eraill yn derbyn addysg uwchradd tu allan i’r sir; mae hynny yn wir hefyd am blant oed cynradd.
- Dengys y data a ddarparwyd gan ysgolion am gynnydd plant sy’n derbyn gofal bod 83.5% ar y trywydd iawn i gyrraedd eu targedau, roedd 4.6% yn perfformio’n is na’u targedau ac roedd 1.5% yn perfformio’n well na’u targedau; roedd gan 95.5% o ddisgyblion sy’n blant sy’n derbyn gofal lefelau presenoldeb da.
- Roedd rhai o’r bobl ifanc yng ngofal yr Awdurdod i fod i gwblhau eu cyrsiau gradd yn ystod haf 2021.

Diolchodd y Panel i’r Gwasanaeth Dysgu am y wybodaeth ac roedd yn cydnabod bod darparu data ystyrion yn anodd o dan yr amgylchiadau. Serch hynny, dywedodd y Panel, er mwyn iddo ef a’r Cyngor gyflawni eu cyfrifoldebau fel rhieni corfforaethol, bod angen iddo weld data a fydd yn rhoi sicrwydd iddo fod pob plentyn yng ngofal yr Awdurdod yn gwneud cynnydd yn unol â’r disgwyliadau a’u bod yn cyflawni eu potensial. I’r perwyl hwnnw, gofynnodd am adroddiad ysgrifenedig yng nghyfarfod nesaf y Panel yn nodi targedau pob plentyn sy’n derbyn gofal, eu perfformiad gwirioneddol yn erbyn y targed, eu hoedran a’u blwyddyn ysgol. Nododd y Panel hefyd bod nifer y plant sy’n derbyn gofal sy’n derbyn eu haddysg ar yr ynys yn galonogol, ond roedd yn dymuno gwybod pam fod eraill mewn darpariaeth tu allan i’r sir.

Wrth gydnabod pwysigrwydd y data perfformiad i bwrpasau hunanasesu a sicrwydd, cadarnhaodd yr Uwch Reolwr Llesiant bod y Cynllun Addysg Personol electronig wedi’i gwblhau yn awr a’i fod yn cynnwys gwybodaeth a ddarparwyd gan ysgolion. Mae hyfforddiant pellach ar ddefnyddio’r Cynllun Addysg Personol wedi’i drefnu ar gyfer yr wythnos nesaf.

Cytunwyd i –

- Nodi'r wybodaeth a gyflwynwyd ar lafar.
- Gofyn i'r Gwasanaeth Dysgu ddarparu adroddiad i'r Panel yn ei gyfarfod nesaf yn manylu ar y targedau ar gyfer pob plentyn sy'n derbyn gofal, eu perfformiad gwirioneddol yn erbyn y targed, eu hoedran a'u blwyddyn ysgol. Dylai'r adroddiad roi sylw hefyd i'r rhesymau pam fod nifer fechan o blant sy'n derbyn gofal yn derbyn eu haddysg tu allan i'r sir.

## 8 CYFARFOD NESAF

Nodwyd y trefniadau ar gyfer cyfarfod nesaf y Panel a gynhelir am 10:00am, dydd Mawrth 15 Mawrth 2021.

**Mrs Annwen Morgan  
Cadeirydd**

DRAFT